



HARI KESEDARAN JERUNG DAN PARI 14 JULAI 2023

Shark Awareness Day merupakan satu sambutan di seluruh dunia bagi mendidik orang ramai akan kepentingan ikan yu di laut. Sempena sambutan ini juga masyarakat akan dididik dengan lebih banyak fakta berkenaan ikan yu selain daripada sifat ganas yang dipaparkan melalui filem. Jabatan Perikanan Malaysia telah menguatkuasakan perlindungan di bawah Peraturan-peraturan Perikanan (Pengawalan Spesies Ikan Yang Terancam) 1999, Akta Perikanan 1985.

YBhg. Dato' Adnan bin Hussain, Ketua Pengarah Perikanan Malaysia berkata antara yu yang dilindungi adalah Yu tukul parang (*Sphyrna mokarran*), Yu tukul palang (*Eusphyra blochii*), Yu tukul (*Sphyrna zygaena*), Yu sirip putih besar (*Carcharhinus longimanus*) dan Yu paus (*Rhincodon typus*). Beliau turut menyatakan antara usaha Jabatan Perikanan dalam kempen-kempen yang sedia ada seperti kempen “Tak Nak Sirip Ikan Yu” yang dilancarkan sempena Pameran Pertanian, Hortikultur dan Agro Pelancongan Malaysia (MAHA) 2018. Kempen ini adalah sebahagian dari usaha konservasi ikan yu di negara ini.

Sebanyak 68 spesies ikan yu telah ditemui dalam perairan Malaysia. Sarawak merupakan negeri yang paling banyak menerima pendaratan ikan yu kerana kawasan tangkapan ikan yang luas dan habitat yang sesuai. Selain itu, pengurusan sumber yang cekap, ekosistem marin dan kawasan pesisiran pantai yang subur turut menyumbang kepada kelestarian hidupan ini di Malaysia. Melalui penyelidikan yang dijalankan oleh jabatan sejak 2018 sehingga Mac 2021, perairan Kuala Pahang telah dikenalpasti sebagai habitat pembiakan semulajadi bagi 3 spesies yu dan 13 spesies pari iaitu dari order Orectolobiformes (famili Hemiscyllidae) dan order Myliobatiformes (famili Dasyatidae dan Gymnuridae) telah direkodkan.

Kawasan ini akan dicadangkan sebagai Zon Konservasi di mana tidak ada sebarang aktiviti menangkap ikan dijalankan di kawasan sekitar. Secara semulajadinya ikan yu membiak melalui kaedah bertelur dan beranak mengikut spesies.

Umumnya, pendaratan yu pada tahun 2022 adalah tidak melebihi 0.5% daripada jumlah keseluruhan pendaratan ikan marin iaitu 4,578 tan metrik daripada 1.3 juta tan metrik. Jumlah ini menunjukkan ikan yu bukan spesies ikan yang disasarkan dalam tangkapan, sebaliknya terperangkap melalui penggunaan alat tangkapan seperti pukat tunda.

Jabatan Perikanan Malaysia menyeru orang ramai agar tidak memilih sirip yu sebagai pilihan makanan. Tempoh bunting ikan yu mengambil masa yang agak lama berbanding ikan-ikan lain. Jumlah anak ikan yang dihasilkan juga tidak banyak bagi setiap kelahiran. Rakyat Malaysia diseru agar bersama-sama memelihara dan memulihara ikan yu yang mempunyai fungsi penting di dalam ekosistem laut.

Orang awam boleh berkunjung ke Pusat Ikan Hiasan Port Dickson yang diselia oleh Jabatan Perikanan bagi melihat pameran ikan-ikan hiasan termasuk ikan Yu. Waktu beroperasi bermula jam 9 pagi sehingga 4.30 petang tanpa sebarang bayaran masuk.

Kenyataan media ini disiarkan oleh:

UNIT KOMUNIKASI KORPORAT

Ibu Pejabat, Jabatan Perikanan Malaysia

Wisma Tani, Putrajaya

Email : ukk@dof.gov.my; pro@dof.gov.my